

# 程其保 · 范源濂 · 周蔚生

周邦道

## 當代教育先進傳之十七

### 程其保 (1895-1975)

程其保，原名璨，字穉秋，江西南昌人。先世自徽歙遷贛。曾祖雨田、祖春生、均縣學生。父登穀，字秋農，舉孝廉方正。兄瑋、其信、瑛、其偉、瑄、其修、璘、其某，弟璟、其佳。多留學扶桑，從事路政、公安、教育，有聲於時。孝友傳家，彝倫攸敘。其保光緒二十一年乙未十一月五日生。宣統元年，畢業南昌第一高等小學堂。翌年，放入清華學堂，初肄中學科，課餘常赴村莊，教育兒童。民國三年升高等科，被推為校中青年會長，則與副會長沈克非，創辦週末半日學校。基於此種鄉村社會教育之經驗，興趣益發，遂立定以教育為終身事業之弘願焉！

七年秋，以庚款留學美國，入明州韓林大學三年級。次年三月，紐約萬國青年會電約赴法，為大戰後在戰地及各工廠之華工，辦理社會教育。嘗與晏陽初、傅葆琛，以「千字課」、「千字報」為教材，作各種福利娛樂活動；每週末，則

分赴英、德、意、瑞、比遊覽。回韓林，以一學期修完大學課程。轉入芝加哥大學，以半年獲教育碩士。尋肄哥倫比亞師範學院，讀教育博士學位。糾組「聾社」，與本國同學，勵志教育。十二年夏，竟業。

國立東南大學校長郭秉文，慕其名，電聘為執行秘書兼教育學教授。適第一屆世界教育會議在美京舉行，復推請為我國出席代表，且膺選為大會第五組主席，研討教科書問題；甫出校門，嶄露頭角，人羨為殊榮。蒞秣陵，與湯用彤、柳詒徵、陶知行、吳宓、竺可楨、孟憲承、鄭宗海、陸志韋、廖世承、胡先驕、楊銓等，同為名教授。蔣維喬代理校長時，主持教務。旋代理原由郭秉文兼任之上海商科大學校長。北伐軍興，與黨驍驍，淞滬成爲政治鬥爭區域。常與交通大學校長凌鴻勳（後爲黎照寰）、持志大學校長何世枚、光華大夏二大學副校長朱經農、歐元懷、國民大學殷芝齡等，籌維對策；商大尚賢堂，輒成爲壇坫重心矣。

英美十三個教會聯合創設之齊魯大學，歷史悠久，學風淳樸。因知友凌冰（濟東）薦，往濟南主持教育系務數年。東南改組爲中央大學後，應教育學院院長韋愨（捧丹）之邀，於二十年返京任教。值舉行第一屆高等考試，典試委員長戴傳賢延請校士。在八府塘棘闈中匝月，與張默君、冒鶴亭、曹纓衡等唱和，朱墨爛斑，傳爲韻事。朱家驊繼張乃燕爲中大校長，聘長教育學院；於是羅致艾偉、許恪士、羅廷光、夏承楓、王書林、徐悲鴻、常導之等學者爲教授，濟濟稱盛焉。

二十一年，朱氏轉長教育部，派李熙謀、楊廉、郭有守、厲家祥、考察歐洲教育，其保爲團長。返國，出長湖北省教育廳，學識既豐，經驗亦贍，三年游刃，連爾有成。後以部員兼任中央政治學校教授十稔，並主邊疆學校校務，長西康教育廳時，其所訓藏康學生，多與相助爲理。抗戰勝利前後，朱氏再掌邦教，初派赴東北視察，處理東北大學風潮，旋南回，處理浙江、英士、中正等大學紛糾，命代理英大校長，未就。比膺

選立法委員，復奉派為出席巴黎聯合國教育、科學、文化組織代表。主席兼秘書長赫胥黎（Dr. Julian Huxley）名科學家之裔）、教育處長比伯（Dr. Clarence C. Beeby），深所傾服，聘為副處長，類等國際教育部次長，職位重要，遂向立法院辭卸委員職。

三十八年，大陸撤退，聯教組織精神驟變；乃由法轉美，任教漢諾威及長島大學。不久，應郭秉文所創組華美協進社（China Institute in America）之約，任文化事業組主任。前後十四年，勞績工作：一為邀梁啟超、胡適、陳立夫、錢泰等，對本國青年作中國近代史講演；一為邀林語堂、胡適、張彭春、吳經熊、顧毓琇、梅貽寶、顧翊羣、陳榮捷、李田意等，對美國大眾作學術文化之專題講演；一為每年舉行中美文化關係圓桌會議，集中美學人共同研究文化交流問題；一為組織「全美華學教師協會」，以任中國語文及文化教師為主體，輪流在著名大學舉行年會。此外，於張其昀長教部時所設「在美教育文化事業顧問委員會」，則為委員兼執行秘書；於紐約中華文化協會，則代于斌主持會務。對於推行國民外交、發揚禹甸文化、輔導留學青年、聯繫國內外學術界人士，交流國際文化，貢獻尤多；說者謂其可與梅貽琦、郭秉文、胡適，方駕並驅也。

其保溫文爾雅，誠篤摯謙，粹然儒宗，藹然仁者。處事勤慎精練，果毅堅韌，羣倫推為祭酒。自始至終，矢志教育，鏗而不捨。由鄉村教育、社會教育而學校教育，由地方教育而中樞教育，

由國內教育而國際教育；如此圓成周備，世罕其儔。六十四年五月二十九日，溘逝紐約，年八十有一。緬念醇儒，士林愴悼！嚴總統特頒「績學流馨」匾額，用示表揚。著述有：小學行政概論、小學教育概論、初等教育、教學法概要、教育原理、學務調查、中學教育法、管教養衛合一教育、近百年留美學生史等書，後者親自調查綜述，尤為珍貴。夫人藍如涓、密歇根大學碩士，曾執教中大政大。子四：長、宗賢，季、振賢，電機學博士，三、惠賢，農學博士，均居美；次、紀賢，文學博士，居巴黎；棣鄂韓韓，稱一門俊秀云。

### 范源濂（1876-1927）

范源濂，字靜生，湖南湘陰人。生於清光緒二年丙子某月日。少孤，從舅讀書清泉。戊戌維新，考入長沙湘撫陳寶箴所創設時務學堂。停辦後，與蔡鐸等東渡，受學於其師原總教習梁啟超所辦大同高等學校，旋轉學東亞商業學校，畢業東京高等師範學校。時，赴東留學者日衆，因國內學校初創學科設備不全，大抵程度參差，無相當學校可入。源濂因仿日本維新時急就成規，與曹汝霖等，在東京創辦速成法政、師範諸科，法政以一年半畢業，師範則半年畢業，俾略具法政、教育常識以應時需。聘譯員為之譯述講義，不必學習日語。不及二年，全國聞風來學者，至二萬餘人，成空前未有之盛況。

三十年甲辰回湘，倡議送女生赴日習師範。奔走月餘，得十二人，率之東渡，送入東京實踐

女子學校，實開女生留學之先河。乙巳，學部議設法政學堂於北京，聘日人主教，而任源濂為學部主事，佐之。丙午，糾合同志創設殖邊學堂，招學生百餘人，授以蒙藏語及墾殖諸科目。又籌辦優級師範學堂、清華學校。宣統元年己酉冬，發起尚志學會，購置會所於北京化石橋，並籌集基金，附設醫院及學校，編譯關於文化及科學書籍。嘗謂「尚志學會規模雖小，無異中國社會事業之一苗圃。」可以規其志趣矣。

庚戌冬，任學部參事，規定學制及學校章程，以期全國學堂悉統制於部章之下，然後徐圖教育之普及。嗣後雖屢有增改，然大體仍因其舊。民國成立，任教育部次長，旋繼蔡元培為教育總長，刻意籌畫，多所建樹。在職半年，以政見不符引退，就中華書局編輯部長。五年七月，再任段祺瑞內閣之教育總長。七年春，與嚴修同赴美國，徧歷各州，於其教育實況，多所研求。九年八月，三就靳雲鵬內閣之教育總長；次夏辭職，從事於生物學之研究。

十一年春，再遊美國，考究鄉村教育。翌年赴英，與彼邦人士討論退還庚子賠款事，主張設各種學術研究院、圖書館、補助留學經費，並在外國大學設中國學術講座，以宣揚中國文化。旋任北京師範大學校長。十三年一月，復被任教育總長，但未到職。九月，任中國教育文化基金會董事，被推為幹事長。其所主張，多見定議。十六年十二月二十三日，以腹膜炎歿於津寓，年五十二。



程其保博士(前排右二)生前在紐約與薛光前(後排右二)項定榮(後右三)等合影

## 周蔚生

周蔚生，字性初，一字濬初，江西奉新人，世居乾洲村，父仍叔，清舉人，以鴻碩稱。蔚生穎悟軼羣，文采卓異。年十六，鄉試中式，揀選廣西知縣，未需次。肄業經訓書院與周爾璧、盧銘鼎，同為皮錫瑞鹿門高弟。學使吳綱齋，選送京師大學堂，入經科，儕輩欽其學行。既畢業，為江西官立農業專門學堂(省立農業專校前身)教務長。鑿舍初開，模新鏡舊，匠心獨運，淑發彌多；農教礎基，因資以奠立焉。

民國三年，出長江西省立第二師範學校。校設贛州吉南贛寧兵備道屬瀟溪書院，與省立第四中學所在地之贛州府屬陽明書院，南北對峙。有明倫堂、尊經閣、身教齋、靜觀堂、仰止亭、蘇(東坡)陽(孝本)夜話亭、麗澤山齋、筆峯山、廉泉諸勝蹟，風景幽雅。蔚生坐擁泉比，筆路締建，主人格感化教育，多士翕然。暇與贛南道尹邵啓賢蓮士、四中校長鍾起衡莘民、前庚南初級師範學堂監督丘全德及黃衍衷(後長四中)、蕭葛天、黃邦啓、黃邦直等，以詩酒唱和為樂。以贛州會幾、吉甫之詩，淵穆滄遠，放翁所師，而未有帙集行世，乃發起輯編茶山集，交商務印書館出版。庚申辛酉間，嘗調任鵝湖省立第四師範校長及教育廳科長，由張景江鏡海接任。因校潮動盪，不久即回職雙江。先後延攬辛際周、廖牧笙、盧榮光、周石泉、余彭齡、黃衍衷、易鎮寰、王光祖、鄒榮治、蕭謙、盧溥周、李文奎、歐陽燁諸氏執教，人才踴濟，極一時盛也。

國民革命軍，既底定江西。十六年一月，省立中學師範合併，冠以地名。四中二師合稱省立贛縣中學，設校務委員會，張廣鴻為委員長，蔚生為委員，仍主持二師校政。六月，中央舉行清黨，贛南特別委員會主任倪弼，掌理贛南十七屬黨政。蔚生任教育科長，改組各校，復校長制，復局勢為之一新。寧漢合作，陳禮江長教育廳，復以序數為校名。贛中易名第三中學，蔚生重為校長。居恆儼然以莊，溫然以和，木訥不善辭令。然其不言之教，無為之化，感應道交，至深且遠。二十年間，煦育誠樸純良之學風，造就政教黨軍人才甚眾，迹蔚生之學問品概，暨其志事，與休寧安徽省立第二師範校長胡晉接子承，頗相伯仲。晉接亦已列傳，贛南皖南，二師媲美，無獨有偶，洵足述矣。

蔚生既退休，及門賴慶觀、丘英、黃開仁、劉瑛等，感其教思既窮，就二師附小舊址，設學崇祀，以易繫辭「成性存存」雙關義，顏曰「存存中學」。而清風兩袖，寧處與嗟；謝壽麟、謝壽喬、劉典蘭、劉惟祐等則於南昌進賢門外，為營小築，洗請遷入。版圖易色後，數稔謝世，年近八十。弟蔚清、蔚章、蔚綬，均有聲庠序。妹一適熊希存，甲午舉人；一適辛佐鈞，江西省視學。子緒暄、緒曠，專攻科學，明德達人，能世其家云。

(本報公哲、陳泮藻、方仁河諸氏所提供  
及作者主持二師教務所見所聞資料。)